

Isumaginninnermut Naalakkersuisoqarfik  
Departementet for Sociale Anliggender

Aleqa Hammond

**§ 36 atorlugu 30. september 2009-mi Aleqa Hammond-imit (Siumut)  
apeqqummut akissuteqaat pineqarluni AIS 2010-mi nunaqarfinni  
inuulluarneq**

13. oktober 2009  
Sags nr.

Dok.nr. 240735

Postboks 260  
3900 Nuuk  
Tlf. (+299) 34 50 00  
Fax (+299) 32 55 05  
E-mail: in@gh.gl

Inatsisartunut ilaasortaq Aleqa Hammond qujassuteqarfigissavara Naalakkersuisut inuulluarneq pillugu politikkiannut soqutiginnimmat. Allakkatigut 30. september 2009-imeersutigut Inatsisartunut ilaasortaq Inatsisartut suleriaasianni § 36 imm. 1 naapertorlugu imaattumik apeqquteqarpoq:

*Naalakkersuisut 2010-mut aningaasanut inatsisissatut siunnersuutaanni qulequtaq "Inuulluarneq" atorneqarpoq, apeqqutigiumavaralu 2010-mi nunaqarfinnut avinngarusimanerusunilu inuulluarneq qanoq ittoq atuutsinneqassanersoq eqqarsaatigaasiuk?*

Naalakkersuisunit sammillugit aallunneqartut ilagaat inuulluarnerup annertusisinnissaa apeqqutaatinnagu illoqarfimmi nunaqarfimmiluunniit najugaqarneq.

Inuulluarneq pillugu ataatsimiititaliarsuaq piffissami aggersumi akileraarutitsinnik akitsuutitsinnillu sukumiisumik misissueqqissaarniarpoq kiisalu isumaginninnikkut ineqarnikkullu tapiissuteqariaatsinik aamma tapiissuteqariaatsit akornanni sunniivigeqatigiittoqartarneranik. Sulinerup tamatuma kingunerissavaa allanngortiterinerit, allannguinerit aamma suliniutit il.il. pillugit siunnersuusiortoqarnera, inuiaqatigiitsinni innuttaasunut tamanut illoqarfinni nunaqarfinnilu inuulluarnermik annertusisitsisussat.

Naalakkersuisunit meeqqanut inuusuttunullu immikkut suliniuteqarnerat pissutigalugu pineqartumi suliniutissanut nutaanut 2010-mut aningaasanut inatsisikkut 25 mio. kroninik immikkoortitsisimavugut. Taakku 25 mio. kronit Naalakkersuisunit isigineqarput piffissamut sivirusumut aningaasaliinertut, taakkulu siunissami meeqqanut ilaqutariinnullu meerartalinnut nuna tamakkerlugu illoqarfinni nunaqarfinnilu inuulluarnerup annertunerulerneranik qularnaarinnittussaapput.

Tamatumunga oqaatigisariaqarpoq, Naalackersuisunit siusinnaartumik pensionit qaffanneqarniarmata juni 2010-miit innuttaasunut peqqissutsikkut ajornartorsiutilinnut inuuniarnikkut atukkat qaffatsinniarlugit. Matumani aammaarluni immikkoortitsisoqanngilaq, innuttaasup illoqarfimmi nunaqarfimmiluunniit najugaqartuunera.

Inussiamersumik inuulluaqqusilluta  
Maliina Abelsen (IA)  
Isumaginninnermut Naalackersuisoq